

GA 7007 Cuir Venderdi, ils 6 da matg 2011

Far meins attractivs il spazi da viver dallas tscharvas

DA HANS HUONDER / ANR

■ **Per impedir pli gronds donns entras las tscharvas egl uaul sur il vitg da Curaglia ein las empremas mesiras vegnidas pridas.** Ellas pertuccan la protecziun da plontas digl avegnir, ils englars egl uaul e las deponias. La sonda vargada han catschaduras e catschadurs montau reits artificialas vid plontas giuvnas egl uaul sur Curaglia. Quellas duein gidar ad impedir donns dalla selvaschina vid la scorsa. Dabia lavur ha era il forestalesser prestau igl unviern vargau en quei uaul. Sin ina surfatscha da

rodund treis hectaras ei ina tgira intensiva digl uaul succedida. Quel ei vegnius slargaus aschia ch'el ei ussa meins attractivs sco refugi per la selvaschina. Empremas mesiras ha era la vischnaunca priu concernent sias deponias. La deponia sut Curaglia ei vegnida serrada. Perencunter ei vegniu aviert ina nova deponia serrada a Fadretsch. Tonaton vegn la selvaschina a viver vinavon el contuorn dil vitg da Curaglia. Differents facturs attractivs per ella san buca vegnir eliminai, sco per exempel il sal sin las vias.

➤ PAGINA 5



Igl uaul sur Curaglia ei in liug tschercau dalla selvaschina. FOTO H. HUONDER

Success mo en stretga cooperaziun

Las empremas mesiras per impedir tscharvas el vitg da Curaglia ein vegnidas pridas

DA HANS HUONDER / ANR

■ El decuors dils davos meins ein differentas mesiras vegnidas pridas a Curaglia per impedir donns dallas tscharvas vid igl uaul da protecziun. Vid ina da quellas han las catschaduras ed ils catschadurs cooperau la sonda passada. Vid plantas dil futur ei vegniu montau reits artificialas ch'impedeschan donns dalla selvaschina vid la scorsa. L'entschatta fevrer han las autoritads communalas, il forestalesser e la survigilonza da catscha informau davart ils donns caschunai dallas tscharvas egl uaul da regiuvnaziun sur Curaglia. La concentraziun da tscharvas dils davos onns sur il vitg ha differentas raschuns. D'ina vart catta la selvaschina leu bunas relaziuns da refugi, dall'otra vart eis ella ella vischinonza dil vitg nua ch'ella sa survir duront igl unviern da cumposts e da restonzas entuorn clavaus e nuegls. Aschia setenevan differents animals era si duront la notg el vitg. El rom d'ina informaziun publica han las autoritads presentau ils problems ed appellau als vischins da serrar lur cumposts, mo era da buca perver sapientivamein ils animals selvadis.

Mesiras indispensablas

Cun occasiun dall'informaziun publica il fevrer ei vegniu puntuau la necessitad d'instradar differentas mesiras en favur dalla protecziun digl uaul da schurmetg sur il vitg da Curaglia. «Igl unviern vargau havein nus tgerau intensivamein igl uaul sin ina surfatscha da rodund treis hectaras. Nus havein pinau ora plantas per aschia far el pli lartgs e cheutras meins attractivs sco refugi per las



La sonda vargada ha la Secziun da catschadurs Vallatscha montau reits artificialas vid plantas dil futur egl uaul sur il vitg da Curaglia.

MAD

tscharvas», di il forester communal *Corsin Flepp*. In'ulteriura mesira ch'il forestalesser preveda ei da procurar per daplì largias enteifer igl uaul giuven. Cheutras duei la selvaschina che duei buca vegnir bandischada cumpleinamein ord igl uaul survir leu da vivonda ed aschia untgir las plantas giuvnas. La sonda vargada ha la Secziun da ca-

tschadurs Vallatscha organisau in di da tgira el territori pertuccau sur Curaglia. Tschun catschadurs e duas candidatas da catschaduras han montau reits artificialas vid plantas dil futur. Quellas reits protegian las plantas da donns entras la selvaschina. La scorsa dalla plonta giuvna ei numnadamein in vivonda preferida da quella, en special era dalla

tscharva. «Quellas reits ein elasticas ed aschia pon ellas seslargiar parallelmein cun la carschientscha dallas plantas. Culs onns semaglia la reit si», declara *Corsin Flepp*. Las reits ein vegnidas montadas entochen sin in'altezia da dus meters. Il material vegn indemnissaus entras igl uffeci forestal. «Quella acziun vala sco mesira immediata. Ulteriuras

vegnan a suandar ils proxims onns el rom d'in concept ch'ei en elavuraziun», puntuescha il forester communal.

Problem sesligia buca da sesez

Entginas mesiras ein era gia vegnidas pridas davart la vischnaunca. «Nus havein serrau la deponia ad Acla-sut sut Curaglia. Il medem mument havein nus aviert ina nova deponia serrada a Fadretschi», di gerau *Marius Flepp*. Ils purs ein vegni incumbensai da clauder las ballas da silo e da procurar ch'ils animals cattien buca vivonda el contuorn dils clavaus e nuegls. «Cun nosa informaziun igl unviern vargau havein nus segiramein saviu sensibilisar in vischin ni l'auter per la problematica dallas tscharvas. Senza las mesiras che nus havein presentau leu savein nus denton buca sliagir ils problems», di il survigilader da catscha *Daniel Bundi*. La regiuvnaziun sur il vitg da Curaglia ei in liug tschercau dalla selvaschina e quei vegn a restar en ina fuorma ni l'otra: «Las mesiras ch'ei vegnidas pridas e ch'ei aunc d'instradar vegnan a purtar ina migliur. Ei restan denton entgens facturs favoreivels per la selvaschina, denter auter il sal sin las vias. Quel ei tschercau dad ella.» La survigilonza da catscha vegn ad animar ils catschadurs da far catscha el territori sur Curaglia era duront la catscha d'atun. Era quei ei ina mesira necessaria. Per *Daniel Bundi* ei il success pussevils mo sche tuts ein prompts da trer per la medema suga: «Far sittar nus mintg'onn igl unviern enzacontas tscharvas ei negina soluziun a liunga vosta. Quei essan nus era buca prompts da far, sche nus sentin che las autras mesiras vegnan buca exequidas ed acceptadas.»